

**Najib Tiba Di Phnom Penh Untuk Sidang Kemuncak Asean  
Bernama  
17 November, 2012  
Daripada Jamaluddin Muhammad**

PHNOM PENH, 17 Nov (Bernama) - Perdana Menteri Datuk Seri Najib Tun Razak tiba di sini Sabtu untuk menghadiri Sidang Kemuncak Asean dan persidangan-persidangan berkaitan selama tiga hari bermula Ahad.

Pesawat yang membawa perdana menteri dan isterinya Datin Seri Rosmah Mansor mendarat di Lapangan Terbang Antarabangsa Phnom Penh pada 8.30 malam (Waktu Malaysia: 9.30 mlm).

Ketibaan mereka disambut oleh Menteri Penerangan Kemboja Khieu Kannarith.

Najib mempunyai aturcara yang cukup sibuk dalam tiga hari ini oleh kerana selain menghadiri Sidang Kemuncak Asean ke-21, akan juga menghadiri lapan sidang kemuncak berkaitan.

Sidang kemuncak berkaitan ialah Mesyuarat Pemimpin-pemimpin Asean dengan Majlis Penasihat Perniagaan Asean, Sidang Kemuncak Asean-Jepun ke-15, Sidang Kemuncak Asean-Republik Korea ke-15, Sidang Kemuncak Peringatan Asean Campur Tiga, Sidang Kemuncak Asean-India ke-10, Sidang Kemuncak Asean-China ke-15, Mesyuarat Pemimpin-pemimpin Asean-AS ke-4, dan Sidang Kemuncak Asia Timur ke-7.

Kesemua persidangan itu akan berlangsung di Peace Palace, di sini tempat letaknya Pejabat Perdana Menteri Kemboja.

Najib juga dijadual menemui Perdana Menteri China Wen Jiabao, Presiden Myanmar U Thien Sein dan Perdana Menteri Vietnam Nguyen Tan Dung di luar sidang kemuncak itu.

Presiden Amerika Syarikat yang dipilih semula Barack Obama dijadual hadir pada mesyuarat Pemimpin-pemimpin Asean-AS dan Sidang Kemuncak Asia Timur ke-7.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=709660>